

四庫全書

史部

欽定四庫全書

史部

三吳水考卷六

七

詳校官監察御史臣周元良

刑部郎中臣許兆椿覆勘

總校官檢討臣何思鈞

校對官編修臣沈清藻

謄錄監生臣鰲 圖

欽定四庫全書

三吳水考卷六

明張內蘊周大韶撰

水年考

小序

治水紀年者何謹災祥也降災者天回天者人是故修德以銷之者上立事以防之者次變沴既作而後攘臂畚韁以赴之者下水旱之災國家通患迺吳中之所謂災者獨水爲棘矣夫吳澤國也諸

水浩淼易蓄而難洩一遇淫雨積潦蛟龍鼓怒陽
侯布威惡風乘之洪波巨濤砰湃橫溢豈惟禾稼
渰傷即廬舍井竈蕩爲水鄉民其魚乎惟守土者
勤修德義敬天勤民朝夕欽欽必講求水政先事
豫防疏壅塞以通水道置堰閘以時啓閉築圩岸
以障流潦濬溝洫以時蓄洩如是則天且降康不
幸而遇災而吾先事有備矣是守土者之所宜留
心也古昔以來年代遞遷災異時有備錄謹書一

披覽則廩廩悚畏矣作水年考

宋元嘉中三吳水歲饑詔發會稽宣城二郡米穀賜被

水人

梁大通中吳郡水災上言當漕大瀆以瀉松江

宋大中祥符四年辛亥九月吳水氾濫壞廬舍

乾興元年壬戌五月大水

元豐元年戊午七月四日夜蘇州大雨潮高二丈餘

漂蕩尹山至吳江塘岸洗滌橋梁沙土皆盡惟

石僅存

四年辛酉七月蘇州大水民居邊湖者皆蕩盡
吳江長橋摧去其半橋南至平望皆如掃吳江
以非露地而哭平望以南刈禾而歌

元祐六年辛未吳中水災詔賜米斛及錢賑濟

元符二年己卯六月久雨蘇湖秀等郡尤罹水患

大觀元年十月蘇湖水災

政和五年乙未八月蘇湖諸郡水災

紹興二年壬子詔吳江等處一應積欠租賦並蠲免

二十八年戊寅七月平江大風雨駕湖水漂溺數百里壞田廬

隆興元年癸未八月大風雨蘇湖爲甚

二年甲申七月蘇湖皆大水侵城郡壞廬舍田圩軍壘操舟行市者累日人溺死甚衆越月積陰苦雨水患益甚民流淮東

紹熙五年甲寅八月大雨平江江溢圮田廬甚衆

嘉定十六年癸未五月江潮大溢平江爲甚漂廬舍

害苗稼圮城郭隄防溺死者衆

元至元二十三年丙戌六月大水平江屬縣水壞民田

一萬七千二百頃

二十七年庚寅大水

二十九年壬辰六月大水

元貞元年乙未五月大水九月又大水

大德二年戊戌大雨湖水氾濫

五年辛丑六月大水

十年丙午五月大水害稼七月大風海溢吳江

大水

至大四年辛亥雨水沒田

延祐三年丙辰雨水沒田

五年戊午 六年己未 七年庚申大雨水沒

田

至治二年壬戌十一月平江大水損民田四萬九千

六百頃

三年癸亥大雨水

泰定三年丙寅吳中水田半渰

天歷元年戊辰八月平江水沒民田萬計

至順元年庚午秋七月平江大水壞民田萬計十月

吳江大風太湖水溢漂民居萬家

三年壬申吳中水

元統二年甲戌吳中水沒田

至元三年丁丑 四年戊寅 五年己卯 六年庚

辰吳中水田俱渰

至正二年壬午吳中水 四年甲申水

六年丙戌水渰田半收

七年丁亥吳中大水無秋

八年戊子四月平江大水

十年庚寅吳中雨田渰過半

明永樂二年甲申夏五月蘇州大雨水田幾盡沒歲饑

民雜藻荇爲食有投河而死者六月命賑恤之

三年乙酉大水 五年丁亥六月戊子水

七年己丑大水

九年辛卯 十年壬辰 十一年癸巳 十二

年甲午 十三年乙未 十四年丙申俱水

十六年戊戌大水 二十年壬寅 二十一年

癸卯俱大水 二十二年甲辰水

宣德元年丙午大雨水無秋

二年丁未 三年戊申俱水 六年辛亥水

九年甲寅大水無秋有寬恤勅賑荒停止物料

正統元年丙辰水 四年己未水

七年壬戌吳中大水繼於七月十七日颶風大作圩岸俱坍巡撫周忱奏留官糧一十二萬賑濟

八年癸亥八月大風雨壞稻

十年乙丑水

十一年丙寅五月大水

十二年丁卯旱

十三年戊辰水

十四年己巳大水無秋

景泰元年庚午大水

三年壬申水

五年甲戌春大雪平地丈餘太湖諸港冰結舟
楫不通入夏大水漂沒田廬斗米千錢餓殍相

枕兩稅無徵以濟農倉積米三十餘萬貯盡又納粟補官以繼之

七年丙子秋水農乘船而刈

天順元年丁丑大水無秋

三年己卯 四年庚辰俱大水斗米千錢

六年壬午 七年癸未 八年甲申俱大水

成化元年乙酉大水無秋

二年丙戌 三年丁亥俱大水

七年辛卯 八年壬辰俱大水

九年癸巳大水

十一年乙未水

十四年戊戌大水

十七年辛丑春夏大旱秋冬大水

十八年壬寅春夏大水

十九年癸卯春夏大水不害稼

二十年甲辰水

二十一年乙巳秋大旱

二十二年丙午大水

弘治元年戊申水

四年辛亥 五年壬子俱大水田禾壞民多流

徙大疫

六年癸丑五月大水

七年甲寅大水冒城郭舟入市田渰幾盡

十一年戊午水溢 十八年乙丑水

正德四年己巳七月初七日雨至二十三日大水無
秋

五年庚午夏四月橫漲滔天水及樹杪吳江長
橋之不浸者尺餘耳浮屍斷標蔽川而下雖得
援附而生者悉流淮揚通泰之間吳中田拋荒
自此始

前此水渰田稅勘一分准免一分勘二分准免
二分時非無起運也每依奏免且有優恤惟此
年官司先聽起運糧四百萬石災從存留內扣
免而存留不及十之二又先復熟三分則所准

免者名雖七分總槩縣全數而計之不過十分
中之一分四釐而已追念永樂弘治以來豈無
起運而每年災糧何以俱得優免哉自此年以
起運全派四府至今災年皆准爲例或謂此例
自戶部尚書秦闕所題或謂起運原槩派於徽
州等各府因彼府旱災之年巡撫改派於蘇松
四府初不遇借辦一年耳適改者去位而嗣撫
者不知改移之故執爲典常日久人亡莫稽其
由吳民寃苦其有既哉此年不免之糧在所必
徵司權者慮有他虞調停每年帶徵三分皆白
水也村鎮人家自此干不存百不存十雖流
民反以淮揚通泰為樂土久竟不歸吳下荒田
安得不積而多也哉

十年乙亥大水

十三年戊寅六月大雨水渰田十之七

撫按與有司皆

以起運者不免自是聞災不復題知但將高田
不渰者以足其數熟田人戶更多賠補微比之

寃矣後遂爲例

十五年庚辰大水民艱食

嘉靖元年壬午七月二十五日辰時大風起自東北
而西北而西南至酉拔木壞民廬舍駕太湖水
高丈餘漂沒吳江城外及簡村邊湖去處人畜
無算間有附木隨風著岸得生者問之但見滿

湖皆火云各縣被湖水田皆沒

二年癸未大旱

三年甲申先旱蝗後多風雨大水民艱食米貴

四年乙酉水

十年辛卯雨不害田無秋

十四年乙未春雨夏旱秋大水

十六年丁酉大水

十七年戊戌夏大雨害稼

二十三年甲辰大旱河底皆坼

二十四年乙巳旱斗米千錢人食草根木皮大疫路殍相枕

二十八年己酉大水

三十七年戊午雨水渰中下田

四十年辛酉宿潦自臘春霪徂夏兼以高淳東壩決五堰下注太湖襄陵溢海六郡全渰秋冬淋潦塘市無路場圃行舟吳江城垣崩圮者半

民廬漂蕩墊溺無筭村鎮斷火飢殍相望幼男
稚女拋棄津梁寒士貞婦刎縊自斃兼之疫癟
相仍更多殃札量水者謂多於正德五年五寸
國朝以來之變所未有也

隆慶四年庚午水

五年辛未水不害稼

萬歷五年丁丑水

六年戊寅秋九月大風連晝夜禾多不實冬大

雪湖渺蕩漾皆冰經旬不解行者如市十二月
初九夜未半澁湖南有聲如戰鬪居人自遠窺
之遙見湖中火光無數移時乃定次早探之則
湖內堅冰凝結如故田圩間俱已壘成冰山層
巒壘障坡麓宛然高及二三丈延袤三圩竟不
知從何而來

七年己卯夏菜麥不收五月霪雨如注連晝夜
不息山源併集江海氾溢禾苗盡渰

八年庚辰自四月閏四月至五月霪雨傾注晝夜不息加以浙直諸山蛟蜃繼起江海水溢西至留都東及杭郡平地湧數尺常熟濱江並海等處全沒三吳告災幸吳淞白茆二大河開濬而大水有洩災當十之七八而君相加意元元蠲恤之令相望於道黔首賴以全活者無筭不然靡有孑遺矣

九年辛巳八月十六日驟雨渰田大風損稼自

冬徂春歲不沴寒桃李復華經臘不雪人不衣
綿蘇民有藏冰市利者是年水澤不冰人皆異
之至十年春疫癟相纏民多夭札六月十三夜
二鼓風雨晦冥冰窖搜去如掃松江余山七寶
鎮等處市房石橋樹木舟船多被拔置他處死
傷甚衆民有徐姓者掣去數人莫知所著是夜
雨溢圩田幸而墻岸無損併力車救禾稼獲全
十年壬午秋七月十三日晡時微風起自東北

尋即拔木壞廬駕海潮平地二丈餘漂沒上海
嘉定崇明沿江等處人民動以萬計孳畜無筭
風捲太湖港汊皆乾遙見滿湖皆火須臾風勢
旋自西南擁回湖水勢如排山大雨如注驟然
震傾吳江城外簡村地方民畜房舍如掃翊日
浮屍蔽川崑山青浦常熟等各縣田疇圩埂亦
多傾壞吳民洶洶幸而水退如駛禾稼漸亦回
生因即修繕車救多有獲全者咸謂吳淞白茆

二大河洩瀉有賴云父老謂自嘉靖元年壬午
至此又直氣候災異之一周焉

三吳水考卷六

欽定四庫全書

三吳水考卷七

明張內蘊周大韶撰

水官考小序

水之有官專治水之責也以水名官以官治水將平成之績是賴非以備員也是故六卿分職厥有司空諸曹率屬亦置都水在外則有水利臬大夫郡司馬朝廷每修水利輒遣公卿大臣往督其事

而以百執事佐之近復命憲臣以璽書行事諸所
建白重且鉅者奏請於上其餘一切皆得從便宜
彈壓諸司諸司有不率不力者皆得論刺之其事
權良重必也憲修政舉事乃奏功奠我元元福利
社稷用光史冊以告來世斯其無負於任使乎朝
廷設官各有專責故吏治不清則問太宰戶口不
蕃則問司農典禮多缺則問秩宗戎事失戒則問
司馬刑獄匪平則問司寇地利未盡則問司空憲

法罕飭則問執法小民靡寧則問司牧邊鄙多警
則問疆吏水利湮廢則問水官此朝廷之所以使
天下於指臂而坐策四海者也作水官考

宰臣

虞 禹 洪水橫流下民昏墊舜命禹爲司空疏
九河距九川導三江定震澤

吳 伍員 吳相國開蘇州胥口塘柳胥港洩太湖
積水開溧陽銀林河以通伐楚餉道

越

范蠡

越相國開蘇州蠡口塘常州蠡湖及東

蠡河西蠡河

楚

黃歇

楚相國開松江之黃浦常州之申港黃

田港後人因以名河

元

禿魯

工部尚書至正元年濬松江南北俞塘

盤龍塘鹽鐵塘二年修捍海塘

部臺

明

夏原吉永樂二年江南大水命戶部尚書夏原

吉疏治濬崑山夏駕新洋二浦嘉定之
顧浦引吳淞江水由劉家河入海濬常
熟白茆塘引東北諸水入楊子江濬上
海之范家浜南接黃浦北合吳淞江亦
入於海

李充嗣工部尚書正德十六年治水吳中是時
郎中林文沛顏如環從行濬吳淞江白
茆港及蘇松常嘉湖各屬河道

周忱

工部侍郎正統中濬吳淞江濬黃浦修
田圍及吳江湖隄築杭州塘修金山獨
樹營及劉家港口諸河

李敏

巡撫工部侍郎景泰五年治水濬青墩
浦橫瀝塘以通白茆濬三堰引水通鮎
魚口仍去海口壅塞

徐貫

工部侍郎弘治八年濬吳淞江白茆港
斜堰七浦塘鹽鐵塘及吳江長橋水竇

以洩太湖之水

徐栻 兵部侍郎浙江巡撫都御史萬曆三年

五月三十日夜海潮氾溢衝坍海塘西
自秦駐山東至白馬廟延袤一十八里
漂流廬舍溺死人口無筭先該前右副
都御史謝鵬舉題請修築五年該兵部
右侍郎都察院右僉都御史徐栻接管
築完海塘二千六百餘丈用銀一十二

萬八百七十五兩有奇塘成海潮不復爲患

俞士吉僉都御史永樂中命齎水利集賜原吉

佐原吉講求水利

崔恭 巡撫都御史天順三年濬吳淞江蒲匯

塘曹家港六磊塘烏泥涇沙岡塘竹岡
塘諸水入於黃浦

畢亨 巡撫都御史成化八年築捍海塘疏濬

河渠

王恕 巡撫都御史濬宜興便民河

何鑑 巡撫都御史與徐侍郎貫同治水

彭禮 巡撫都御史弘治十二年濬太倉湖川

塘

俞諫 巡撫都御史正德六年治水濬宜興諸

瀆濱江陰利港新溝九里河

許廷光浙江都御史正德十四年奏請興修水

利自後差李尚書

歐陽必進都御史嘉靖二十六年濬七浦塘

翁大立巡撫都御史嘉靖三十八年奏請興修

水利

林潤 巡撫都御史隆慶二年濬白茆塘題請

丈均松江府田糧民免虛賠之害

海瑞 巡撫都御史隆慶三年再濬白茆塘置

閘濬吳淞江東段八十餘里欲并濬吳

淞江中段及吳江太湖諸口功未畢代去時論惜之

寺卿

宋

徐確

宗正使崇寧元年開淞江自封家渡古

江口至大通浦直徹海口七十四里水

道遂通

周環 大理丞紹興二十四年開福山港白茆

塘

明 袁復 太常少卿永樂中輔夏原吉治水

趙居仁右通政永樂三年修嘉興海塘四年濬

孟瀆

凌信 尚寶少卿天順中請濬鎮江漕河作閘
臺臣

晉 張闔 晉陵內史大興四年創置新豐等湖

宋 雍元直校文編校熙寧八年命治浙西河渠

沈括 檢正中書刑房公事熙寧六年相度兩

浙水利

許光凝中書舍人大觀中開吳淞江置十二暘
任古監察御史紹興二十四年按視興修水

利

李結監進奏院隆興元年獻治田三議當時

推行之

明

鄭銘巡按御史成化八年築捍海塘

謝琛

巡按御史正德五年題請開濬吳淞江

馬祿 巡按御史正德十五年題請開濬白茆

港

呂光洵巡按御史嘉靖二十三年興修水利著

水利圖考

劉曰睿巡按御史隆慶五年興修水利開墾荒

田題請三年五年起科則例輕徭薄稅

以勸招徠所在貧民爭先告墾

郭思極巡按御史萬曆五年題請復丹陽練湖

積水備運開孟瀆河以通南北官民船隻

林應訓南京廣東道監察御史萬曆五年奉命治水吳中先是科臣上言蘇松水利久湮特請憲臣督理比至吳中沿洄諸境相度形便廣集衆思慮知溢水爲災由於上源未節三江並行而未分也於是首復練湖增置涵閘以資運道次治吳

淞壅塞四十餘里決去吳江灘漲數十處使太湖積水直注吳淞濱松之山涇等港秀州官紹鹽鐵浦匯六磊等塘洩澱泖諸湖之水於黃浦濱蘇之吳塘顧浦戚虞涇南北橫瀝等處決崑嘉太倉諸水於劉河復濬七浦楊林等塘使陽城巴城諸湖之水徑入於海濱白茆福山三丈諸浦九里青陽山塘雷溝等河

使昆尚承湖毘陵晉陵諸水徑入於江
又於上源濬白鶴溪荆城港西氿裏河
洩長蕩荆溪諸水入於運河濬武進之
孟瀆丹陽之九曲河丹徒之鐵貓港洩
潤州上流之水並入於江以節太湖東
來之源源流各得其所然後於千墩浦
南濬澱山湖口使湖水通徹入於吳淞
又慮江水外逸乃於夏駕及漫水港口

各建石閘一座內節江流外捍渾潮以
固吳淞又設爲治田六事刊布民間督
令高鄉浚溝洫以備旱低鄉築圩岸以
備澇由是吳東諸郡民稱利云當是時
積廢既久財力兩訟實由經度厝注以
身先之又賴兩臺和衷協成役取諸召
募費給於贖緩地值故役興而民不勞
功成而官不費如此云

藩臣

宋 鄭亶 廣東安撫機宜文字上書陳言水利熙寧五年以亶為司農寺丞提舉兩浙水利所著有水利書行於世

元 旭萬傑行省中書右丞泰定中奏復都水庸田使司興修水利

欽察台江浙行省中書左丞相至正初上言浙西水利

明

閻察

浙江布政司叅議重築海鹽縣捍海塘

謝輔

浙江叅政正統九年築捍海新塘與陳

永協心殫力並著勞績

何宜

浙江叅政有治田水利策畧

邢簡

叅政治水吳中

王叔果兵備叅政萬曆二年任是時水利積廢
公獨究心於此講求累歲萬曆五年時
本院奉勅按視吳中水利公矢謀殫慮

開孟瀆復練湖具有端緒開江之役方
將舉行而聞調回籍未見其成頻行捐
輸本道項下贓贖銀五千九百餘兩然
則身雖去而於河工蓋亦未爲無助云

臬臣

唐

韓皋 元和初爲觀察使開常熟塘

明

鄭元韶督糧僉事隆慶三年均松江府田糧濬

三陽河

陳永 浙江僉事

吳瑞 浙江僉事成化八年築捍海塘

趙銘 僉事治水吳中

伍性 浙江僉事弘治元年濬吳淞江中段四

十餘里及顧會趙屯都臺等浦蒲匯新

涇楊林等塘并海鹽陶涇塘濬宜興湯

溪葛溪又議開吳江長橋淤土以洩湖

流工未畢代去

熊允懋僉事嘉靖元年帶管蘇松水利

蔡乾 僉事嘉靖四年帶管蘇松水利濬蘇州

市河濬吳縣興福塘崑山黃昌涇上杜

塘注浦道褐浦常熟三丈浦橫瀝塘嘉

定練祁趙涇北橫瀝桃樹浦虬江木瀆

港舊江界河南鹽鐵雙塘河江陰脫水

港馮涇白蕩河應天河泥塘河蔡港黃

田港上海張家浜陳村塘馬家浜舊江

青龍江并修黃田閘

馮叔吉兵備按察使萬曆六年任是時濬吳淞
江濱吳江之吳家港長橋灘龐山湖口
及松江秀州塘蒲匯塘太倉七浦塘常
熟白茆港皆矢謀率屬勞勸爲多

李頤 兵備副使萬曆八年任督修各屬圩岸
處置銀穀賑濟荒民

運司

唐 劉晏 永泰中爲轉運使開練湖

宋 張綸 天禧中爲江淮發運使疏五湖導太湖

入海

徐奭 天聖中爲轉運使治水自市涇以北赤

門以南築石堤九十里濬積潦自吳江

東赴海復良田數千頃

趙賀 江淮發運使董治太湖外塘濬積潦與

徐奭同事同功

葉清臣轉運使寶元初開盤龍塘等匯濬澠瀆等江民賴其利

鄭向 轉運副使疏潤州蒜山漕渠抵於江人便利之

沈立 轉運使嘉祐初開顧會浦

王純臣轉運使嘉祐五年令蘇湖常秀修作田塍位位相接以禦風濤定勸課爲殿最當時推行之

李復圭轉運使大修至和塘開白鶴匯民免水患

毛漸 轉運副使紹聖中開無錫芙蓉湖武進疏廟堂港常熟疏梅李塘入楊子江崑山開七鴉港下張浦入海又開華亭之新涇大盈等浦東南濬柘湖新涇下金山小官浦皆入於海

陳仲芳發運司屬官相度蘇州積水

向子諲兩浙轉運使紹興七年置呂城石礎及

夾岡二斗門

趙子瀟轉運使紹興二十八年計料開江

陳彌作兩浙轉運判官隆興二年請先開十浦

合開圍田一十三處又請招置闕額開

江兵卒

姜詵 轉運副使開松江通波塘置張涇堰閘

又奏開常熟黃泗浦崔浦許浦白茆浦

陳峴 兩浙轉運判官開濬常州江陰諸川港

魏峻 發運使淳熙六年疏至和塘

部屬

宋

楊及 乾興初爲職方員外郎催督蘇湖秀疏

導壅閼

邵光 左朝奉郎元祐六年導決太湖積水

明

姚文灝工部主事弘治九年開七鴉港築沙湖

堤奏設導河夫役

祝萃 工部主事弘治中命徐侍郎貫治水萃

從行贊理

傅潮 工部郎中弘治十年治水吳中濬黃渡

等浦湖川等塘

臧麟 工部郎中弘治十四年濬莊前港并丁

山瀆盛瀆鴉瀆

林文沛工部郎中正德十六年從尚書李充嗣

治水開白茆塘及昆城陽城尚湖諸口

皆白茆之上源也并開蘇松常鎮各縣
諸河道修海鹽塘

顏如環工部郎中亦從尚書李充嗣治水開吳
淞江并湖州大錢小梅二港沿湖七十
二溇以導太湖之上源開趙屯大盈道
褐等浦以通淞江之上源

朱袞 工部郎中嘉靖九年奉命治水吳中

武職

晉 郝鑒 參軍永和六年按視蘇湖積水

宋 戚世明淳熙元年開許浦

馮湛 水軍統制淳熙二年濬許浦

錢良臣總領重修練湖橫壩及諸斗門

水部

宋 單謗 宜興進士上書言水利常平使者調蘇

常秀之民濬青龍等江

鮑朝懋崇寧元年置提舉澳牘司於蘇州以知

崑山鮑朝懋提舉管幹

趙霖 提舉常平使宣和二年開常州五十八

瀆措置華亭泖湖圍田

薛元鼎提舉常平淳熙元年相視太湖沿流利

害開茜涇七鴉下張白茆等浦及運河

羅點 提舉浙西常平淳熙十三年奏治澱山

湖沿湖灘占復諸良田

詹體仁提舉常平淳熙十五年開河置斗門爲

旱潦備

元

任仁發都水監大德間濬吳淞江泰定初復濬

淞江舊江二道并松江平江通海河道

築海寧縣捍海塘

李都水至大初督治圍田

張仲仁都水少監

刺史

吳

陳勲 赤烏八年使檢尉陳勲發兵三萬鑿破

岡瀆

宋 劉濬 始興王揚州刺史元嘉二十二年濬吳

淞江滬瀆又欲從武康紵溪穿渠滄直

出海口

梁 王奕 交州刺史漕大瀆以洩浙江

唐 章損 永泰初為刺史開練河

丁頤 貞元中刺蘇湖繕完隄防疏鑿畝澗列
樹以表道決水以溉田

李素 元和初刺蘇州開常熟塘因名元和塘

范傳正元和中開平望湖及長興之西湖

王仲舒元和五年治蘇堤淞江為路

孟簡 元和中開無錫之泰伯瀆并常州之孟

瀆

郡守

晉

沈嘉 吳興太守開荻塘

謝安 建元中築塘人因名謝公塘

宋

范仲淹景祐初守鄉郡上書宰臣言水利親歷

海口開濬五湖及茜涇下張等浦使太

湖水東南入吳淞江東北入於海

許恢

慶歷二年知常州府濬申港深港戚墅

港等處

李餘慶

慶歷三年知常州府濬顧塘河益引惠

明河水注之漕渠濬常州市河及金涇

鶴瀆等浦

陳襄 嘉祐四年知常州府以太湖積水橫遏運河爲民田患立法濬之導水入江其

患乃息

蔡抗 嘉祐六年知平江府行縣按水立法疏

治

林希 元祐六年知杭州府上言導決太湖積

水

王回 紹興四年知湖州府濬沿湖七十二溇

導水入太湖

蔣燦 紹興二十八年知平江府計料開江請

復招補開江兵卒

陳正同紹興二十九年上言水利請禁占射圍

田

沈度 乾道二年知平江府開許浦白茆浦崔

浦黃泗浦奚浦茜涇七鶴下張沙握凡

十浦請招置開江兵卒

蔡洸 乾道六年知潤州濬河自丹陽至夾閩

丘密 乾道七年知秀州府修華亭沿海一十

八堰

宗貺 乾道七年知潤州府濬河自利涉門至

江口

張津 淳熙二年知潤州府濬京口河

林寔 淳熙十三年知常州府濬後河

史能之

林祖洽皆常州守並濬後河

陳君仁淳熙二年知潤州府置黃水磮

萬鍾 慶元四年知潤州府濬城市河越十六

年郡守史彌堅復疏潔之

邢燾 嘉定中知常州府濬九里河

丘彥櫓嘉定十年知平江府丘彥櫓開錦帆涇

以通運道

吳瀟 嘉定五年知平江府修吳江石塘橋梁

柯元壽淳祐二年知潤州修復練湖復置閘

趙溍 咸淳六年知潤州府改作程公上下二

壩

明

孫用 洪武七年知常州府濬申港

劉辰 洪武三十四年知鎮江府重濬練湖

黃懋 正統九年知嘉興府築海鹽新塘

汪滸 景泰五年知蘇州府濬白茆塘

葉冕 景泰間知松江府築澱山湖堤

白行中成化八年知松江府築捍海塘

丘霽 成化十年知蘇州府開吳淞江

史簡 弘治八年知蘇州府開濬吳淞江白茆

港七浦塘

徐讚 蘇州府知府正德十六年開白茆港

孔輔 松江府知府督濬吳淞江

李充寶萬曆五年知蘇州府協同同知王事聖

劉琨濬吳淞江長橋南北灘吳塘顧浦

七浦塘楊林塘湖川塘白茆塘許浦三
丈浦福山塘等處

朱文科萬曆八年知蘇州府協同同知王事聖

孫成泰修築各州縣田圩并四門官塘

開濬虬江奚浦等處

賈待問萬曆五年知松江府協同通判蔣守成

推官范守已濬吳淞江秀州塘官紹塘

鹽鐵塘蒲匯塘都臺浦山涇港等處

閻邦寧萬歷七年知松江府濬盤龍塘橫塘橫
泖等處督修各屬田園

穆婦 萬曆五年由比部尚書郎知常州府開
濬孟河置閘蓄防以通漕溉號爲天闢
又開宜興西氿城南運河東倉水道修
復芙蓉湖黃天蕩雷家湖諸堤各綿亘
數百里溉圩田四萬四千餘畝惟時比
歲病旱阻淺運舟又請築閘運河支渠

置木閘蓄水舟運通利修斂起廢課士
訓民善政甚多

張純 萬曆五年知鎮江府率通判

閘

修

復練湖闢侵占改函管增置石礎石閘

蓄水灌漕

鍾庚陽萬曆七年知鎮江府率通判楊棟濬九

曲河鐵貓港甘露港等處築傍江田堤

郡貳

宋

張去惑景祐間推平江與府官分捍水道

李禹卿慶歷二年通判平江言淞江風濤多敗

漕舟遂築太湖堤五六十里又修荻塘

曹永 紹興中判松江府開顧會浦

明

傅愷

楊憲 並松江府同知成化八年築海塘

楊冠 嘉興府同知成化八年修海鹽塘

應能 蘇州府通判成化中奏請興修水利

郝希顏松江府通判弘治七年濬吳淞江自帆

歸口至分莊七十餘里

原應宿松江府通判弘治十二年濬崧子浦

陳暉 蘇州通判弘治十二年督濬湖川塘

黃譜 太倉州判同陳暉濬湖川塘

溫應壁常州通判濬江陰利港新溝九里河

韓士賢嘉興通判正德七年與知縣辛九齡重

築海塘

徐乾 蘇州同知

傅潮 通判並白茆督工

萬奎 蘇州通判督濬昆承陽城尚湖諸口

冷宗元蘇州同知

孔賢 蘇州府通判督濬趙屯大盈道褐等浦

王事聖蘇州府同知萬曆五年任專督水利濬

吳淞江四十餘里及吳江之吳家港長

橋灘龐山湖口常熟之白茆港三丈浦
太倉之七浦塘楊林塘鹽鐵塘吳塘顧
浦崑山之大瓦浦赤涇夏駕浦嘉定之
張家浜南翔河渭浦等河隨事區畫各
中機宜故蘇之河工雖甚多而應之裕
如各底於績

蔣守成松江府通判萬歷五年任專督水利濬
秀州塘官紹塘蒲匯塘大小山涇港都

臺浦沙岡塘竹岡塘盤龍塘橫瀝小淶
浦橫塘橫泖等處日夕在河經月不回
衙舍其積筭土方稽查錢穀皆自磨勘
不假手於人事不徇情功必責實故積
奸巨蠹咸以爲不便云

范守已松江府推官萬曆七年蔣通判解段匹
赴京承委帶管水利治績詳見賈知府

下

韓萃善常州府推官萬曆六年該府水利員缺

承委帶管水利濬青陽九里山塘等河

白鶴等溪及宜興西氿裏河

楊棟 鎮江府通判萬曆七年任

劉師召松江通判萬曆九十等年督濬奉賢黃

泥白龍百曲新港白蓮三林走馬虬江

等河修築濶泖湖黃浦等處圩岸及

秀州官塘修建蔣涇塘橋鍾賈柘澤宋

家橋等處橋梁事舉政修民稱不擾焉

萬輝

常州府通判萬歷八年任專督水利境

內運河如法開濬漕運賴焉并修無錫

江陰田圩高厚百姓稱便

孫成泰蘇州府同知萬歷九年任督修該管長

吳等縣塘圩溝洫高厚深廣如法萬歷

十年七月十三日風變境內邊湖海處

田廬漂沒甚衆竭力修復如故民稱頌

焉

縣令

南唐呂延貞丹陽令昇元中濬練湖作斗門以通灌

溉

宋錢貽範慶歷初知華亭縣開顧會浦

范淇慶歷二年知常熟縣濬金涇鶴瀆二浦

楊璵慶歷三年知武進縣濬孟瀆開江

葛閻皇祐中知武進縣疏導漕渠積水

韓正彥嘉祐六年知崑山縣修至和塘開白鶴
滙

蘇京 紹聖中知丹陽縣重濬練湖易置斗門

吳昉 重和中知崑山縣修至和塘

郭京 紹興中知丹陽縣濬練湖易置斗門

劉頴 淳熙元年知常熟縣濬許浦

丁大聲慶元元年知武進縣濬後溪

張宗濤嘉定中知江陰縣濬九里河

李桃 嘉定五年知吳江縣修石塘橋梁

趙心棟景定三年知丹陽縣修練湖復故道

胡恪 進士修三江五匯

明 董復 洪武三十四年知丹陽濬練湖

陳誼 正統六年知丹陽縣築練湖堤修斗門

蔡寔 成化初知丹陽縣築練湖堤修斗門函

管

樊瑾 成化五年知吳縣濱胥山九曲河及胥

口塘

戴冕 華亭知縣

王宦之上海知縣並督工築海塘

雍泰 成化八年知吳縣鑿渠作堰瀦山泉以

溉山田市石築堤捍湖田以禦橫潦

袁道 成化九年知宜興縣濬便民河

任良才弘治三年知江陰縣濬城濠

王傳 弘治七年知江陰縣濬申港

張偉 弘治十一年知武進縣濬運河

楊子器弘治十二年知常熟縣濬許浦梅李塘
高謙 弘治十二年知丹陽縣修濬練湖

徐禎 弘治十五年知江陰縣修黃田閘

黃霆 正德七年知江陰縣濬九里河

劉一中正德七年知江陰縣宜興縣濬永安河

并百瀆

辛九齡正德七年知海鹽縣修海鹽塘

方豪 正德七年知崑山縣上書俞都御史陳建水利

程達 萬曆六年知崑山縣濬吳淞江修築田

圖

李堯民知長洲縣萬曆六年濬吳淞江

劉懷恕知長洲縣萬曆七年任修田圩築齊門
婁門盤門及滸墅關等處塘岸

郝國章知吳縣督濬閭門運河催徵灘田地價

以濟吳淞江等之用最爲勤敏

傅光宅知吳縣萬曆八年任修田圩築楓橋滸

墅閼等處塘岸

留震臣知常熟縣萬曆間濬白茆塘福山塘梅

李塘許浦三丈浦等處

梁宜生萬曆八年知常熟縣濬東西鹽鐵上橫

憑東橫憑潼家報慈草鞋社涇等浜橫

浦崔浦梅林李墓等塘又修府塘官岸

爲丈五千三百有奇

王一言知吳江縣萬歷間濬長橋南北灘吳家
港修長橋九里石塘

徐元 知吳江縣萬歷八年任修田圩築平望
等處塘岸加濬長橋南灘縣丞屠菲協
力

何懋官知崇明縣萬歷七年濬嚮沙中界河平
洋沙登舟沙長沙袁家沙竹箔沙等處

河道

楊東野知華亭縣萬曆八年任修田圩築黃浦

等處塘岸

教選 知上海縣率主簿李士龍濬蒲匯塘都
臺等浦新港等河

鄧炳 知上海縣萬曆八年任濬走馬塘方浜
等處

屠隆 萬曆七年知青浦縣是時境內連雨濱

湖田圩崩塌幾盡民逃賦負墮至召民
墾田官給工費修築塍圩以障流潦比
年逋租逾年而復又受本院方畧指畫
開濬橫塘橫泖盤龍山涇諸塘渠洩泖
澱湖水境內賴之

張守朴知無錫縣督率縣丞吳述濬察亭河廟
堂港等處築芙蓉湖田圍

丁懋建知宜興縣萬歷六年承檄鑿西氿裏河

濬烏嘴李山等瀆

胡士鼇知江陰縣督率縣丞劉楷濬九里河山
塘河舜河青陽河雷溝等處

楊廷相知丹徒縣督率水利縣丞濬九曲河鐵
貓港甘露港增築傍江田堤

尹良任知丹陽縣督率縣丞劉秉彞修復練湖

濬九曲等河

劉美 萬曆八年知金壇縣濬運河及蔭風徐

村白橋下流堵莊下流諸河修築溝塘
圩岸甚衆

孫一俊知武進縣蒞任即修芙蓉湖濬皇里埠
湖萬歷九年十月大開運河自丹陽界
起白家橋止漕運得濟民更賴之

縣佐

宋 丘與權崑山縣主簿至和二年開崑山塘因名
至和塘

鄭喬 將仕郎即鄭亶之子續著水利書亦有

建明

郭三益元祐三年爲常熟縣丞督濬青龍江益所部前期告辦

王珏 鹽官丞紹興四年開華亭海塘河二百餘里漕溉賴之

韓隆胄武進丞紹興九年濬常州運河

秦應剛武進尉紹興九年同濬運河

馬榮祖丹陽尉嘉定元年修築練湖

明 李廷珏萬曆六年宜興丞濬百瀆等河効力甚

多

李三省萬曆六年為吳江尉督濬長橋灘白茆

塘

李士龍上海尉萬曆六年督濬蒲匯塘新港都
臺周浦鹽鐵馬家莊竹黃家嚴懋等塘

渠

郭之藩武進丞萬曆六年督濬孟瀆白鶴舜河

太平等河勞勸爲多又督修芙蓉田園

李應春崑山丞督濬吳淞江夏駕大瓦二浦

吳述 無錫丞督濬察亭廟堂港及芙蓉園

屠菲 吳江丞督濬長橋南灘築平望諸處塘

岸并修田圩

李汝龍華亭縣尉萬曆七年任修築官塘浦埂

海塘泖湖等處圩岸開浚沙竹岡奉賢

蕭塘打鐵百曲御史等涇出力盡勞民

安督率

湯相 青浦縣尉萬歷十年水災異常巡行田

野修築坍毀圩岸督率車救禾稼頗全

專官議

附

宋丞相王安石議曰都水監亦恐不可廢令議者顧謂比三司判官主領之時事日繁費日廣舉天下之役其半在於河渠堤埽因欲廢之此臣之所未喻也朝

廷以爲天下水利領於三司則三司事業不得專意而河渠堤埽之有當經治而力不暇給故別置都水監此所謂修廢官也官修則事舉事舉則雖繁何傷財費則利興利興則雖費何害且所謂舉天下之役半在河渠堤埽者以爲不當役而役之乎以爲當役而役之乎以爲不當役而役之則但當察吏之不才而不當廢監以爲當役而役之則役雖多是乃因置監故吏得修其職而無廢事也何可以廢監乎且今

水土之利患在置官不多而不患其冗也

編修王同祖曰王者體國經野設官分職以爲民極唐虞之時禹作司空以平水土周禮六卿之制有冬官大司空闕典無攷先儒講論周禮以大司空之屬逸在五卿若遂師縣師稻人草人之類是也禹之時洪荒草昧故其任職也專周公之時治定功成故其立法也備帝王之制爲萬世程憲若此我朝設官大率因周禮六卿之名取大唐六典之法而參酌宋元之

舊以成一代之規至爲詳且備矣工部所掌都水虞衡屯田所司可舉而言也外有東南府縣皆有治農專官府有通判縣有縣丞使歲時循行阡陌興修水利以利民田又每遇水災則或勅巡撫都御史等官治水若正統間侍郎周忱景泰間侍郎李敏天順間都御史崔恭成化間都御史畢亨弘治間都御史何鑑朱瑄正德嘉靖間尚書李充嗣是也或特勅尚書侍郎等官專治水患若永樂間戶部尚書夏原吉弘

治間侍郎徐貫正德間都御史俞諫是也或置僉事
於浙江專管蘇松水利則自成化八年始若吳瑞伍
性雷元芳是也至弘治中裁革或勅工部郎中或主
事專治水利若弘治間主事姚文灝郎中傅潮減麟
是也至正德初裁革末年復因水災遣郎中朱袞治
水未幾裁革嘉靖初復勅郎中林文沛治水未幾裁
革迄於今仍以浙江僉事董水利事若蔡乾江良貴
蔡時田王令朱子和是也自弘治以來治水之官或

設或罷率無定制故嘉靖初都御史許廷光都給事中吳巖相繼論列請特設重臣以任治水之責十一年大理寺左寺丞周鳳鳴疏請設專官治水是皆深知東南水利所繫不小故惄惄焉論之於朝莫有能舉而行之者蓋水利之官遇水患興修固爲甚急若歲豐無虞則坐享優游似爲閒冗故議者輒以爲不宜專設殊不知患豫防之策要在於平居而久安長治之規實由於積習非一朝一夕之所能辦也且

東南低下之區歲有水患但大小不同耳夫苟水勢
不漲未足爲患一遇大水蕩爲巨浸有司相顧束手
無策然後縣以聞於府府以聞於撫按撫按會議以
聞於朝事下戶部覆議動經旬日比及奏下文移往
來檢踏災傷又復浹月徐議所以揅荒之策官廩不
足繼以處畫處畫不足繼以勸借比及闢支餓殍已
十之八九矣然後差官治水量財調役開江濬浦不
亦晚乎是皆官不專設水利之法久廢一旦倉卒遇

災遂不可支以至於此也或曰府縣皆有治農官非專設乎夫治農官之設固祖宗良法美意但行之既久不能無弊職任不專或委以別務賢愚不一或雜以庸才且工力財用非所能辦不過於歲時督民修築疏導應行故事而已又焉足以興大事修大功也或曰巡撫都御史兼之可也夫巡撫之職固無所不統但其管轄地方廣大政務浩繁欲其專治水利下行有司之事亦日不暇給矣或曰今浙江僉事之設

專管蘇松水利獨非專官乎是固然也但名雖專管
實則兼治今治所猶在浙江歲時不過巡行一二次
而已至其文移下行有司視爲末務漫不加省亦不
過取具依准回申而已如此而謂之專官可乎或曰
郎中主事昔嘗差委治水亦專官也然有事則差事
已則革廢置不常久暫不定又焉得爲專官乎愚以
爲必如今日僉事之設專管蘇松水利內職則郎中
主事可也外臺則副使僉事可也即於蘇州建立衙

門常時住劄其松常鎮嘉湖杭等府不時巡行及浙東溫台寧紹等府瀕海之區海塘堰壩成法具在無俟興修者則但委有司管轄不必躬親往閱使得專於蘇松相時立法若前所言治田治水之事地利有緩急工程有大小次第舉行以期成效則庶爲專官矣然又須久任責成假以歲月毋徒苟且止辦目前三載考績視其勛業所就量加旌擢雖復遷官仍其舊任如此行之既久則東南之水患庶乎可弭矣何

也蓋官專而地近則有司知所策勵凡有興作期於必行而無廢閣因循之弊任久而法著則下民安於趨赴凡有工役期於必成而無作輟偷惰之虞是則專官久任爲今日水利之急務如此其所以量才而授任者則在於持鈞衡者焉

沈茲曰司空治水古制也東南水國官可不設乎朝廷軫念國計何嘗不遣而不設哉其不能久者非朝廷意也觀之鹽馬屯田非有重於玉食之地也既設

運司又差鹽法御史既設太僕寺行太僕寺苑馬寺
又差巡馬御史各省設按察司屯田官兩直隸差巡
屯御史是朝廷豈靳水利一官之設哉且是官也職
在必專專則法有定守任在必久久則績可責成觀
之八年胼胝而不一入三過之門可知已而豈謂今
之官水者速如傅舍寄如贅龐者哉其不能專且久
者惟監司之不相能焉耳昔如文襄周公天下第一
流人品也其於民情國事真如恫鰥乃身當時治水

奏請官屬多非監司所轄御史何永芳一疏盡革之
周公正當旁午之際手足不能一展幸周公方當君
相屬心再疏懇請仍給官屬以畢乃緒以是例之則
今安得不利於帶攝哉又嘗見監司以天下爲已任
如呂公光洵者累疏東南水利力任而勇圖之功竟
不立何哉瓜期不可逾也今故曰必專官久任而後
可也

兵備叅政東甌王叔果議曰江南水道湮廢已久今

驟欲開復故道非惟工費無從措處即積土何所安置民情必有大不堪者惟當久任專官漸次疏導方可望其底績官不必以水利爲名惟當以治農爲務職考前代江南嘗設有營田司誠以田疇之廣衍民力之勤惰不可無專官以督察之也昔錢鏐以蕞爾之區惟盡力農事遂致富饒我國家財賦仰給東南乃惟知責小民供輸而於治農畧不加意誠職之所未喻或謂小民力田爲生固所自盡添設一官徒以

增擾或謂各府縣治農之官未嘗不設而卒未見有
裨於農事夫百姓愚蒙非提撕則日就荒惰官職卑
猥非督察則甘坐鰥曠今州縣治農之官因上無專
督之長漫不知職守爲何事既有臺臣以總轄於上
不可無治農僉事以承奉專督於下夫所謂治農者
非止於水利也如低鄉畏潦則急於築圩岸高鄉畏
涸則急於濬陂塘幹流病於淤塞也則疏導不可以
不時支流病其分水勢也則堰閘不可以不築以至

江湖之旁坍漲不一坍則速爲開除俾小民免虛賠
之苦漲則即爲陞科俾奸豪銷專利之謀此皆治農
之事也州縣之長既苦於政務之繁力不遑及而丞
簿等官勢固有所不能行江南逋負之多雖由於供
輸之繁而實苦於荒區之累皆原於農事之未修也
欲爲財賦根本計誠莫要於設治農專司終歲帶同
丞貳等官巡行阡陌浮泛江湖問農家之疾苦察田
蕩之利弊時當農隙則督民疏濬築圩農事既興則

爲民清查勸相所謂擇可而勞佚道而使小民習以爲常自不見其擾而反以相安矣昔人謂江南之水利如人之治身不可使氣血一日之不調職以爲國家之視江南如富室之視腴產不可使農佃一日不加勤恤歷考前朝每每數十年間必遭大潦田疇悉淹上供困匱而後建議遣官治水及遣官既至而水勢已漸消稍一疏導輒奏平成令其所治之河厯厯可按悉已漲爲平陸與其修治於變已至之後孰若

預防於未變之前與其驟興於一時以爲無筭之費
孰若漸修於平日以成不勞之功哉若官徒以水利
爲名誠恐三時農事既興疏濬稍息居閒無事議者
又日之爲冗員或水利稍治旋復報罷矣誠不若專
設治農官之可久而有據也

三吳水考卷七